

Headlines

- 1 प्रधानमंत्री नरेंद्र मोदी होंरें आकाशवाणी पर 'मन की बात' प्रोग्राम राएं अपने विचार सांझे कीते न। उनें अंतरिक्ष दे क्षेत्र च होए दे सुधारें दी तरीफ कीती ऐ।
- 2 मोदी होंरें 'हर घर तिरंगा' अभियान दौरान जम्मू-कश्मीर दे लोकें दे उत्साह ते उर्जा दा जिक्र कीता ऐ।
- 3 जम्मू-कश्मीर च चुनावें कोला पैहलें राजनीतिक सरगर्मियां तेज होई गेइयां न। पैहले गेइ दे चुनावें लेई नामांकन भर्चे दाखल करने दी खीरी तरीक 27 अगस्त ऐ।
- 4 जम्मू-कश्मीर च होन जा'रदे विधानसभा चुनावें दे मद्देनजर 800 अफसरें गी चुनावी खर्चे दी निगरानी बारै लोडचदी सिखलाई दिती गेई।
- 5 युवा मामलें ते खेड्डें सरबन्धी केंद्री मंत्री डाक्टर मनसुख मांडविया होंरें लोकें गी गुजारश कीती ऐ जे ओहू खेड्डें सरबन्धी राश्ट्री ध्याडे पर घट्टोघट्ट इक घेंटे लेई बाहर खुल्ले च खेड्डी जाने आली कुसै बी खेड्डू च पक्कू गै हिस्सा लैन।

<><><><><><>

PM-MKB

प्रधानमंत्री नरेंद्र मोदी होंरें आखेआ ऐ जे मुल्ले दे नौजवानें गी अंतरिम क्षेत्र च होए दे सुधारें कन्नै बड़ा मता फायदा पुज्जा ऐ। प्रधानमंत्री होंरें अज्ज आकाशवाणी दे अपने "मन की बात" प्रोग्राम च राश्ट्र गी संबोधित करदे होई आखेआ जे मुल्ले च बड़ा किश होआ करदा ऐ जेदे कन्नै इक्क विकसित भारत दी नीहू निगार होआ करदी ऐ। उनें आखेआ जे इस म्हीने दी 23 तरीक गी देश दे लोकें चंद्रयान-3 दी कामयाबी च राश्ट्रीय अंतरिक्ष ध्याडा मनाया। उनें आखेआ जे पिछले बरे इस ध्याडे चंद्रयान-3 नै चन्नै दे दक्खणी हिस्से च शिव शक्ति केंद्र पर कामयाब लैंडिंग कीती ही। उनें आखेआ जे भारत दुनिया दा पैहला मुल्ले बनी गेआ ऐ जिन्नै एहू उपलब्धि हासल कीती ऐ। प्रधानमंत्री होंरें 'हर घर तिरंगा' अभियान बारै बोलदे होई आखेआ जे जम्मू-कश्मीर दे रियासी जिले च दुनिया दे सब्बनें कोलां लम्में चिनाव रेलवे पुल पर 750 मीटर लम्मा राश्ट्रीय झंडा फैहराया गेआ। मोदी होंरें आखेआ जे जिन्ने बी एहू तस्वीरां दिक्खियां उसी गर्व मसूस होआ। प्रधानमंत्री होंरें लोकें गी आखेआ जे ओहू बरखा दे पानी दी सांभ-सम्भाल सरबन्धी 'कैच दा रेन' अभियान ते 'एक पेड़ मां के नाम' अभियान च हिस्सा लैन। प्रधानमंत्री होंरें 'मन की बात' प्रोग्राम च तंदरूस्ती बारै बी गल्लबात कीती ते जीवन च एहूदे महत्वै दा जिक्र कीता। मोदी होंरें आखेआ जे पेरिस च किश दिनें च गै पैरा ओलंपिक खेड्डां शुरू होने आह्लियां न ते 140 करोड़ भारतीय देश दे खडारियें ते एथलीटें दी हौसलाफजाई करा करदे न। मोदी होंरें लोकें गी औंदे जन्माष्टमी, गणेश चतुर्थी, ओनम त्यार दियां ममारखां दिदित्यां।

<><><><><><>

Politics-J&K

भारती चुनावें कमीशन आस्सेया जम्मू-कश्मीर च विधानसभा चुनावें दी घोषणा करने मगरा इत्थै सियासी गतिविधियां तेज होई गेइयां न। 18 सितंबर गी पैहले गेइ दा मतदान होना ऐ। इस चरणै च दक्खन कश्मीर दियें 16 सीटें ते जम्मू संभाग दे 8 असेंबली हल्ले च वोट पाए जाने न। नामांकन पर्चे दाखल करने दी खीरी तरीक 29 अगस्त ऐ, उवां हल्ले तोड़ी कुसै बी बड्डी पार्टी नै अपने मेदवारें दी सूची दी घोषणा नेई कीती ऐ।

<><><><><><>

NC-Congress

जम्मू-कश्मीर च असेंबली दे चुनावें लेई कांग्रेस ते नेशनल कांफ्रेंस दे गठबंधन गी लेइयै यक्कोतक्की आहले हालात बने दे न। प्रदेश कांग्रेस दे नेताएं कल पार्टी दी चुनावें स्क्रीनिंग कमेटी गी सब्बनें 90 असेंबली हल्ले लेई मेदवारें दी सूची सौंपी ऐ। कांग्रेस पार्टी

दी चुनां स्क्रीनिंग कमेटी दी प्रदेश कांग्रेस दे मुकामी नेताएं कन्नै बैठक बी लग्गी ऐ। बैठक दी प्रधानता कांग्रेस पार्टी दे जम्मू-कश्मीर लेई चुनां प्रभारी सुखजिंदर सिंह रन्धावा होरें कीती ते प्रदेश कांग्रेस कमेटी दे प्रधान तारिक हमीद कर्रा होरें बी एहदे च हिस्सा लैता। पार्टी दे इक नेता नै दस्सेआ ऐ जे किश नेताएं सीटें दी बंडु गी लेइयै अपनी चैंता जाह् कौती ते कन्नै गठबंधन दे प्रति नेशनल कांफ्रेंस दी ईमानदारी पर बी सोआल पुट्टे। इस मौके एह फैसला बी लैता गोआ हा जे डेमोक्रेटिक प्रोग्रेसिव आजाद पार्टी थमां कुसै बी नेता गी कांग्रेस च नेई औन दित्ता जाह्ग। तोआई नेशनल कांफ्रेंस दे प्रधान डाक्टर फारूक अब्दुल्ला होरें पार्टी दे सीनियर नेताएं दी इक बैठक लाइयै केई सारे मामलें पर चर्चा कीती। इंदे च कांग्रेस पार्टी कन्नै सीटें दी बंडु आह्ला मसला बी शामिल हा। पार्टी दे केई नेता सीटें दी बंडु आह्ला बवस्था गी लेइयै खुश नेई हैन कीजे उंदा मन्नना ऐ जे एहदे कन्नै किश हलकें च पार्टी दे हितें गी नुक्सान पुज्जी सकदा ऐ।

<><><><><><>

MCC

जम्मू-कश्मीर दे चुनां विभाग नै तकरीबन 800 अफसरें लेई चुनावी खर्चें दी निगरानी बारै कल इक ध्याडे दे ऑनलाइन सिखलाई कार्यक्रम दा सरिस्ता कीता। इस कार्यक्रमै दा उद्घाटन जम्मू-कश्मीर दे मुख् चुनां अधिकारी पांडुरंग के पोले होरें कीता ते एहदे च जिला नोडल अफसरें सनें असैम्बली हलकें दे नोडल अफसरें, फ्लाइंग स्काड टीमें दे प्रभारी अफसरें ते होरनें सरबंधत टीमें दे अफसरें बी हिस्सा लैता। त्रऊं चरणें आले असैम्बली चुनां गी बवस्थित ढंगै सिर करोआने लेई पूरी-पराती तैयारिएं दा जायजा लैने गित्ते पोले होरें डरैक्टर स्तर दे अफसरें दी इक बक्खरी मीटिंग दी बी प्रधानता कीती। बैठक दरान मतदान केंद्रें पर घट्टोघट्ट बुनियादी स्थूलतां यकीनी बनाने बारै चर्चा कीती गेई। पोले होरें अफसरं गी निर्देश दित्ता जे ओहू इक हफ्ते दे अंदर-अंदर कारवाइएं मतल्लक रिपोर्ट जमा करोआन। प्रदेश च कुल 11 ज्हार 838 मतदान केंद्र न जिंदे चा 2 ज्हार 332 शैहरी इलाकें च ते 9 ज्हार 506 ग्रामीण इलाकें च न।

<><><><><><>

Jitendra-US Meet

केंद्री मंत्री डाक्टर जतिंद्र सिंह होरें नमीं दिल्ली च अमरीका-भारत नागरिक परमाणु बपार बारै इक दपक्खी बैठक दी प्रधानता कीती। विज्ञान ते टेक्नोलोजी मंत्रालय नै आखेआ ऐ जे बैठक च विज्ञान, टेक्नोलोजी ते स्वच्छ उर्जा सने महत्वपूर्ण खेत्तरें च दौनें मुख् बश्कार बधदे सैहयोग पर लो पाई गेई। बैठक दरान डाक्टर सिंह होरें ऐलान कीता जे गगनयान मिशन थमां इक भारती अंतरिक्ष जात्तरी, अंतराष्ट्री अंतरिक्ष स्टेशन च शामिल होने लेई तैयार ऐ ते एह भारत ते अमरीका बश्कार अंतरिक्ष सैहयोग च इक महत्वपूर्ण मील दा पत्थर ऐ। उनें कुल संसारी सतह दिएं आपूर्ति श्रृंखलाएं गी सुरक्षित बनाने च इक सांझ-भ्याली दे महत्व पर जोर दित्ता। एहदे च खासतौर पर समीकंडक्टर, फार्मा ते स्वच्छ उर्जा तकनीकें ज्नेय खेत्तर शामिल न। इस उच्च स्तरीय अमरीकी डेलीगेशन दी अगुवाई अंतरराष्ट्री जलवायु नीति लेई अमरीकी राष्ट्रपति हुंदे वरिष्ठ सलाहकार जॉन पोडेस्टा ते अमरीकी उर्जा विभाग दे उप-सचिव डेविड तुर्क होरें कीती। दौनें मुख् आस्सेया अर्थिक विकास, राष्ट्री सुरक्षा ते तकनीकी प्रगति च कुल संसारी सतह दे नेतृत्व गी बधाने च आपसी हितें दे कन्नै उभरदी तकनीकें च अपने सैहयोग गी होर तगडा बनाने दी बचनबद्धता दे कन्नै एह बैठक सम्पन्न होई गेई।

<><><><><><>

Migrants

जम्मू-कश्मीर च असैम्बली दे औंदे चुनाएं च कश्मीरी विस्थापित मतदाताएं गी मतदान करने दी स्थूलत देने लेई चुनां कमिशन नै 24 खास मतदान केंद्र बनाए न। एह मतदान केंद्र जम्मू, उधमपुर ते दिल्ली च बनाए गेन। हाल च होए दे लोकसभा चुनाएं आहले लेखा भारतीय चुनां कमिशन नै कश्मीर घाटी दे विस्थापित लोकें जेडे जम्मू ते उधमपुर रौहंदे न, उंदे लेई फार्म-एम भरने दी जटिल प्रक्रिया गी खत्म करने दा फैसला लैता ऐ। उयां जम्मू-उधमपुर सवां बाहर रौहने आहले विस्थापितें गी फार्म-एम भरना होगा।

<><><><><><>

Employees

जम्मू-कश्मीर च होने आले असैम्बली दे चुनां लेई अफसरें गी तैयार करने ते चुनावी प्रक्रिया कन्नै सरबंधत बक्ख-बक्ख जिम्मेदारिएं बारै जानकार बनाने लेई प्रशासन आस्सेआ जिला ते असैम्बली हलका स्तर दे अफसरें लेई सिखलाई आले

कार्यक्रममें दा आयोजन कीता गेआ ऐ। इनें कार्यक्रममें दरान मास्टर ट्रेनरें आस्सेया उनेंगी ई.वी.एम मशीनें बारै मुकम्मल जानकारी देने दे कन्नोकन्नी अभ्यास आली कार्रवाइएँ दा बी सरिस्ता कीता गेआ।

<><><><><><>

Sports Minister

युवा मामलें ते खेडू मंत्री डाक्टर मनसुख मांडविया होरें लोकें गी गुजारश कीती ऐ जे ओहू इस म्हीने दी 29 तरीक गी राश्ट्री खेडू दिवस दे मौके पर घट्टोधट्ट 1 घंटे लेई बाहर खुल्ले मैदान च खेडू जाने आहली कुसै बी खेडू च पक्क गै हिस्सा लैन। सोशल मीडिया पर जारी इक वीडियो संदेश च डाक्तर मांडविया होरें आखेआ जे लोकें दी शमूलियत गै फिट इंडिया अभियान गी अगगे बदाग। उनें इब्बी आखेआ जे खेलेगा इंडिया तभी तो आगे खिलेया इंडिया गी लेइयै प्रधानमंत्री नरेंद्र मोदी हुंदा नजरिया खेडू दे प्रति राश्ट्र दा मार्गदर्शन करोग।

<><><><><><>

BJP

जम्मू-कश्मीर च होन जा'रदे पैहले गेड दे विधानसभा चुनां लेई भारती जनता पार्टी अज्ज संझा तगर अपने मेदवारें दे नाएं दी पैहली सूची जारी करी देग। नमीं दिल्ली च अज्ज बीजेपी हैडक्वार्टर पर पार्टी दे राश्ट्रीय अध्यक्ष जे.पी नड्डा हुंदी प्रधानता च लगगा करदी केंद्री चुनां कमेटी दी बैठका परेंत इस बारै कोई ऐलान कीता जाई सकदा ऐ। इस बैठका च प्रधानमंत्री नरेंद्र मोदी ते केंद्री चुनां कमेटी दे होर सदस्य बी हिस्सा लैंगन।

<><><><><><>

Jammu-AIIMS

कुल भारतीय आयुर्विज्ञान संस्था एम्स जम्मू च इक बडे मते आधुनिक महत्वै आहले ढांचे दी शुरूआत कीती गई ऐ। एम्स जम्मू दे Surgical Gastroenterology विभाग च Endoscopic procedure unit दी शुरूआत कीती गई ऐ। एहदा मकसद इलाके च विश्व स्तरै दी सेहत सरंधी सेवा उपलब्ध कराना ऐ। एम्स दे प्रवक्ता होरें अज्ज आखेआ जे एहू अज्जै-कल्लै दी तकनीक कन्नै लैस ऐ। एहदे कन्नै मरीज दी दिक्खभाल च बेहतरी औग ते इलाज मुतक्कल खरे नतीजे सामने आंगन। एम्स जम्मू दे मुख्ब कार्यकारी अधिकारी प्रोफेसर शक्ति कुमार गुप्ता होरें आखेआ जे एहू पैहलकदमी एम्स जम्मू दी स्हाढी टीम दी मेहनत ते साथ सैहयोग दी भावना दा सबूत ऐ।

<><><><><><>

Krishna-Janamashtmi

कल मनाए जाने आले श्री कृष्ण जन्माटमी दे पर्व दे मद्देनजर पूरे जम्मू संभाग च मंदरें गी शैल सनाखडे ढंगै नै सजाया गेदा ऐ। केई थाहरें पर खास पंडाल लाए गेदे न जित्ये कल बडुलै मुंह-न्हैरे थमां लेइयै अही रातीं तगर सत्संग ते विशेष प्रार्थना कीतिआं जांगन। एहदे शा पैहले धर्मार्थ ट्रस्ट आस्सेया कल जम्मू शैहरा च इक शानदार शोभा यात्रा बी कडूी गई जेडी रघुनाथ मंदर थमां शुरू होई ते जम्मू शैहरा दे बकख-बकख बजारें चा लंगने परेंत रघुनाथ मंदर पुज्जियै सम्पन्न होई। खरी मती गिनतरी च श्रद्धालुएं इस शोभा जात्रा च हिस्सा लैता। केई बजार संगठनें ते मुस्लिम समुदाय दे लोकें बी जात्रा दा बधी-चढियै सोआगत कीता। प्रधासन नै इस शोभा यात्रा लेई लोडचदे सब्बै प्रबंध कीते दे हे।

<><><><><><>

Reasi-Manjha

जिला प्रशासन रियासी नै चीनी डोर गट्टु दे इस्तेमाल, बिक्री ते खरीद पर पूरी चाल्ली रोक लाई दिती ऐ। इस बारै जानकारी दिंदे होई तैहसीलदार सुरेश कुमार होरें दस्सेया जे जिले च गुड्डियां डोआने आस्तै लोक साधारण धागें दा इस्तेमाल करी सकदे न जेदे नै कुसै दी जोन-जोखिम च नेई पवै।

<><><><><><>